

A FORMACIÓN PROFESIONAL DUAL

A Formación Profesional Dual é unha nova modalidade de Formación Profesional que se realiza en réxime de alternancia entre a formación dentro do centro educativo e a práctica laboral unha empresa.

Os aspectos fundamentais da formación profesional dual están regulados no Real Decreto 1529/2012, de 8 de novembro que ademais desenvolve o contrato para a formación e o aprendizaxe.

A implantación desta modalidade e a súa oferta educativa depende de cada Comunidade Autónoma. Na actualidade estanse a realizar probas piloto ao longo de todo o territorio do Estado para poñer en funcionamento esta figura, que nun futuro espérase que sexa á modalidade mais utilizada. Con ela a administración que achegarse a un sistema que está moi estendido ao longo de toda Europa (especialmente Alemania), onde prima a idea de que as persoas que cursan formación profesional poidan combinar o período lectivo coas prácticas en empresas achegándose o mais posible a realidade do mundo laboral.

A FORMACIÓN PROFESIONAL DUAL EN GALICIA

En Galicia o establecemento da Formación Profesional Dual iniciase coa publicación da orde do 10 de xaneiro de 2013 da Consellería de Cultura, Educación e Ordenación Universitaria pola que se autoriza un proxecto experimental de formación profesional dual do ciclo formativo de grao superior de Sistemas de Telecomunicacións e Informáticos, polo réxime de persoas adultas, para o curso 2012/2013.

Trátase do primeiro paso na implantación deste modelo e funciona como unha proba piloto. Con ela pretendese fomentar a colaboración das empresas no desenvolvemento da formación profesional do sistema educativo co obxecto de adecuar as ensinanzas dos ciclos formativos ás necesidades específicas de formación que demandan as empresas.

ASPECTOS BÁSICOS DO PROXECTO EXPERIMENTAL DE FP DUAL

O proxecto experimental de formación profesional dual realízase como actividade formativa inherente aos contratos para a formación e o aprendizaxe, e ten por obxecto a cualificación profesional das persoas traballadoras nun réxime de alternancia da actividade laboral retribuída nunha empresa coa actividade formativa recibida no marco do sistema educativo.

A formación é compartida entre o centro educativo e a empresa, que lle facilite ao centro de formación os espazos, as instalacións e/ou as persoas expertas para impartir parcialmente determinados módulos profesionais, e será impartida no centro educativo polo profesorado de ensino secundario e profesorado técnico de formación profesional.

Plan de formación e aprendizaxe

O proxecto de FP dual terá unha duración máxima de tres anos e impartirase co plan de estudos publicado ao efecto, coa especificación das horas de formación para realizar no centro educativo e na empresa para cada módulo profesional.

A formación no centro de traballo regulase a través dos acordos subscritos entre a empresa e o centro educativo, que consignarán, entre outros aspectos:

- A programación para cada un dos módulos profesionais.
- As actividades que cumpran realizar no centro educativo e na empresa
- E o calendario, a xornada e os horarios en que se realizará a actividade laboral na empresa e a correspondente actividade formativa.

Requisitos das persoas participantes

- Cumprir os requisitos de acceso ao réxime para as persoas adultas.
- Non ter realizado con anterioridade un contrato de formación e aprendizaxe, e cumprir os requisitos establecidos na normativa laboral vixente para poder efectualo.
- Ter entre 16 e 30 anos, e carecer da cualificación profesional obtida e recoñecida polo sistema de formación para o emprego ou do sistema educativo requirida para concertar un contrato en prácticas para o posto de traballo ou ocupación obxecto do contrato de formación e aprendizaxe.
- Non ter superado ningún módulo profesional do ciclo formativo.
- Con carácter xeral, non estar nin ter estado matriculado/a en ningunha ensinanza do sistema educativo no presente curso académico.

Procedemento de admisión

A selección do alumnado admitido será realizada pola empresa a partir das solicitudes presentadas polas persoas que cumpran os requisitos.

Para elo a empresa realizará as probas de coñecementos e capacitación profesional e as entrevistas psicoprofesionais para seleccionar as persoas candidatas que teñan o perfil que mellor se adapte ás características da actividade laboral que será desempeñada no posto de traballo.

Titorías e desenvolvemento da formación

Na empresa

A empresa designará unha persoa como titor ou titora que, entre outras, será responsable do seguimento da actividade formativa e da comunicación co centro de formación.

No centro educativo:

O centro educativo designará unha persoa como titor ou titora do grupo de alumnado que, será responsable da coordinación do equipo docente e será a interlocutora coa empresa para o desenvolvemento da actividade formativa.

Coordinación

A actividade formativa na empresa e no centro educativo será coordinada polos titores e as titoras mediante reunións de control cunha frecuencia mínima mensual, nas cales se realizará o seguimento de cada alumno ou alumna.

Sistema de Avaliación

A avaliación do alumnado será responsabilidade do profesorado dos módulos profesionais do centro educativo, tendo en conta as achegas das persoas expertas da empresa e o resultado das actividades desenvolvidas nesta. A valoración do grao de consecución dos resultados de aprendizaxe establecidos no currículo do ciclo formativo farase tomando como referencia inmediata os criterios de avaliación establecidos para cada módulo profesional.

Ao longo do período formativo correspondente, o profesorado de cada módulo realizará un seguimento do desenvolvemento do proceso de ensino e aprendizaxe, utilizando para iso os instrumentos e os procedementos de recolla de información previamente establecidos na programación dos módulos.

Módulo de formación en centros de traballo e módulo de proxecto

Na finalización do proxecto de formación profesional dual, o alumnado que superase todos os módulos profesionais do ciclo formativo quedará eximido da realización do módulo de formación en centros de traballo e cursará o módulo de proxecto nas condicións que se establecen na súa normativa reguladora.